



Sumáriu Kazu
Tribunál Judisiál Primeira Instáncia Dili
Mai 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Dili

1. Totál kazu ne'ebé JSMP monitoriza: 12

Artigu	Tipu kazu	Númer u
Artigu 145 Kódigo Penál (KP), konjuga ho artigu 2, 3, 35(b) no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	5
Artigu 177 KP	Abuzu seksuál ba menór	1
Artigu 23, 24 no 177 KP	Tentativa, tentativa nia punibilidade abuzu seksuál ba menór	1
Artigu 145 KP	Ofensa ba integridade física simples	1
Artigu 171 KP no artigu 173 KP	Koasaun seksuál no agravaasaun	1
Artigu 207 KP no artigu 148 KP	Krime kondusaun sem karta no ofensa ba integridade física negligente	1

Artigu 296 KP	Pekulatu ho uzu	1
Artigu 314 nú. 2 KP	Fraude fiskál	1
Totál		12

2. Totál desizaun ne'ebé JSMP monitoriza: 12

Tipu desizaun	Artigu	Númeru
Prizaun	66 KP	1
Multa	67 KP	3
Suspensaun ba prizaun nia ezekusaun	68 KP	4
Omologa pedidu dezisténsia keixa	216 KPP	2
Absolve		1
Admoestasaun	82 KP	1
Totál		6

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé kontinua prosesu tuir JSMP nia monitorizasaun: 0

B. Deskrisaun sumariu julgamentu ba desizaun kazu sira

1. Krime ofensa ba integridade fizika simples ho natureza violénsia doméstika

Nú. Prosesu : 0089/22.LIBZT
 Kompozisaun Tribunál : Singulár
 Juís : Dr. Ivan Patrocínio Antonino Gonçalves
 Prokuradór : Dr. Napoleão da Silva
 Defeza : Dr. José da Silva
 Desizaun : Pena multa \$45.00

Iha 5 Maiu 2023, Tribunál Judisiál Primeira Instánsia Dili hala'o julgamentu movel iha Munisípiu Likisá prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AdS hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 4 Agostu 2022, iha oras tuku 19:00 kalan, arguidu tuku dala rua ho maka'as iha lezada nia ulun, tuku dala ida iha lezada nia kakorok no tuku dala

rua iha lezada nia kotuk laran. Antes agresaun ne'e, arguidu ho lezada diskute malu kona-ba lezada fó han hahan restu ba asu. Arguidu nia agresaun ne'e rezulta lezada sofre moras iha ulun, kakorok no moras maka'as iha kotuk laran no lezada konsege ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu arguidu konfensa integralmente ba faktu hotu iha akuzasaun, arguidu husu ona deskulpa ba lezada liu husi kultura timor nian hodi fó sala osan US\$250.00, bibi ida no bintang dos ida. Arguidu mós deklara katak arrepende ninia hahalok no promete sei la komete tan krime hanesan iha futuru.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian tanba konsidera prova suficiente ona. Relasiona ho pedidu ne'e, defeza laiha opozisaun. Nune'e, tribunál presinde audisaun ba lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, di'ak malu ona ho lezada, arrepende ona nia hahalok no arguidu mak sustenta ninia família.

Desizaun

Depoisde avalia faktu sira hotu, tribunál prova katak arguidu tuku dala rua ho maka'as iha lezada nia ulun, tuku dala ida iha lezada nia kakorok no tuku dala rua iha lezada nia kotuk laran.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, di'ak malu ona ho lezada, arrepende nia hahalok, nune'e tribunál konklui prosesu ne'e no kondena arguidu ho pena multa US\$ 45.00, ne'ebé arguidu sei selu 0,50 Sentavus kada lora, durante lora 90. Tribunál mós fiksa pena alternativa durante lora 60 prizaun, bainhira arguidu la selu pena multa refere.

2. Krime ofensa ba integridade física simples ho natureza violénsia doméstika

Nú. Prosesu	: 0087/22.LIBZT
Kompozisaun Tribunál	: Singulár
Juís	: Dr. Ivan Patrocínio Antonino Gonçalves
Prokuradór	: Dr. Napoleão da Silva
Defeza	: Dr. José da Silva
Desizaun	: Pena prizaun tinan 1 suspende ba tinan 1 fulan 6

Iha 5 Maiu 2023, Tribunál Judisiál Primeira Instánsia Dili hala'o julgamentu movel iha Munisípiu Likisá prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AC hasoru nia feen, iha Munisípiu Likisá.

Akuzasaun prokuradór

Prokuradór akuza katak Iha 18 Maiu 2022, iha oras tuku 07:00 dadeer, arguidu basa dala rua ho maka'as iha lezada nia hasan parte karuk no loos. Arguidu nia aktu ne'e rezulta lezada sofre moras maka'as iha lezada nia hasan parte karuk no loos. Antes agresaun ne'e arguidu ho lezada diskute malu kona-ba arguidu deskonfia lezada ba lezada nia kolega professor sira ne'ebé tuir formasaun hamutuk lezada.

Tuir mai iha 27 Agostu 2022, iha oras tuku 04:00, madrugada, arquidu tuku dala rua ho maka'as iha lezada nia ulun, rakut lezada nia fuuk halo lezada monu tun ba rai no kontinua tuku dala ida iha lezada nia kotuk laran. Arguidu nia aktu ne'e rezulta lezada sofre moras maka'as iha lezada nia ulun bubu no metan no moras maka'as iha lezada nia kotuk laran. Lezada konsege ba halo tratamentu iha Sentru Saude Likisá.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklara katak diak malu ona ho lezada no promete sei la komete tan krime seluk hasoru lezada iha futuro.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian tanba konsidera prova suficiente ona. Relasiona ho pedidu ne'e, defeza laiha opozisaun. Nune'e, tribunál presinde audisaun ba lezada.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian, nune'e atu prevene krime hanesan akontese tan iha futuro husu ba tribunál atu kondena arguidu ho pena prizaun tinan ida fulan nen suspende ba tinan rua.

Entretantu defeza husu ba tribunál atu fó pena ne'ebé kmaan ba arguidu ho konsiderasaun katak arguidu konfesa, diak malu ona ho lezada no depoisde akontesementu arguidu la komete tan krime seluk hasoru lezada.

Desizaun

Depoisde avalia faktu sira hotu, tribunál konsidera arguidu provadu komete krime hasoru lezada, nune'e tribunál konklui prosesu ne'e no kondena arguidu ho pena

prizaun tinan ida suspende ba tinan ida fulan neen.

3. Krime ofensa ba integridade fízika simples ho natureza violénsia doméstika

Nú. Prosesu	: 0094/22.LIBZT
Kompozisaun Tribunál	: Singulár
Juís	: Dr. Ivan Patrocinio Antonino Gonçalves
Prokuradór	: Dr. Napoleão da Silva
Defeza	: Dr. José da Silva
Desizaun	: Pena multa US\$45.00

Iha 5 Maiu 2023, Tribunál Judisiál Primeira Instánsia Dili hala'o julgamentu movel iha Munisípiu Likisá prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EV hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 09 Setembru 2022, iha oras tuku 10.00 dadeer, arguidu tuku dala rua iha lezada nia kanotak parte loos, basa dala rua iha lezada nia hasan parte loos, no basa tan dala ida iha lezada nia kanuruk. Antes agresaun ne'e, arguidu ho lezada diskute malu kona-ba osan atu halo uma adat nian, ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun arguidu mós rekoñese ninia hahalok sira, diak malu ona ho lezada, arguidu husu ona deskulpa ba lezada no promete sei la komete tan krime hanesan hasoru lezada iha futuro.

Depoisde rona deklarasaun arguidu nian, prokuradór husu ba tribunál atu presinde deklarasaun lezada nian tanba konsidera prova suficiente ona. Relasiona ho pedidu ne'e, defeza laiha opozisaun. Nune'e, tribunál presinde audisaun ba lezada.

Alegasaun finál

Prokuradór konsidera arguidu provadu komete krime ofensa ba integridade fízika simples hasoru lezada, nune'e husu ba tribunál atu kondena arguidu ho fó pena multa.

Entretantu defeza husu ba tribunál atu aplika pena ne'ebé kmaan ba arguidu ho konsiderasaun katak arguidu konfesa integralmente, di'ak malu ona ho lezada, arrende ona nia hahalok no arguidu mak sustenta ninia família.

Desizaun

Depoisde avalia faktu sira hotu, tribunál prova katak arguidu tuku dala rua iha lezada nia kanotak parte loos, basa dala rua iha lezada nia hasan parte loos, no basa tan dala ida iha lezada nia kanuruk.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, di'ak malu ona ho lezada, husu ona deskulpa ba lezada no promete sei la komete tan krime hanesan hasoru lezada iha futuro, nune'e tribunál konklui prosesu ne'e no kondena arguidu ho pena multa US\$45.00, ne'ebé tribunál sei selu 0,50 sentavus kada loron, durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

4. Krime ofensa ba integridade fízika simples

Nú. Prosesu	: 0053/22.LILIQ
Kompozisaun Tribunál	: Singulár
Juís	: Dr. Ivan Patrocinio Antonino Gonçalves
Prokuradór	: Dr. Napoleão da Silva
Defeza	: Dr. José da Silva
Desizaun	: Omologa pedidu dezisténsia keixa

Iha 5 Maiu 2023, Tribunál Judisiál Primeira Instánsia Dili hala'ó julgamentu movel iha Munisípiu Likisá prezide tentativa konsiliaun ba krime ofensa ba integridade fízika simples ne'ebé envolve arguidu Mario do Santos hasoru lezadu Jacob Alves dos Santos, iha Munisípiu Likisá.

Akuzasaun prokuradór

Prokuradór akuza katak iha 6 Setembru 2022, iha oras tuku 19:00 kalan, argudu hodi besi kanu baku dala ida iha lezadu nia ulun parte reen-toos, rezulta kanek no raan sai barak, halo lezadu sente moras maka'as oin nakukun monu ba rai. Antes agresaun ne'e arguidu ho lezadu diskute malu kona-ba arguidu husu atu selu nia kolen halo uma adat, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa.

Produsaun ba provas sira

Bazeia ba artigu 262 (1) KPP kona-ba tentativa ba konsiliaun, nune'e antes tam aba julgamentu produsaun ba prova, juís husu atu halo tentativa konsiliaun ba arguidu ho lezadu.

Iha prosesu konsiliaun ne'e, sira hakarak dame malu sein kondisaun, tanba antes ne'e sira diak malu ona no mesak família de'it no arguidu promete sei la komete tan krime hanesan iha futuro.

Alegasaun finál

Prokuradór no defeza apresia ho akordu dame ne'ebé parte rua deside ona no husu ba

tribunál atu omologa prosesu ne'e.

Desizaun

Bazeia ba akordu dame no pedidu dezisténsia keixa ne'e, nune'e tuir artigu 262 (2) KPP tribunál konklui prosesu ne'e no omologa pedidu dezisténsia keixa ne'e.

5. Krime koasaun seksuál no agravasaun

Nú. Prosesu : 0309/22.PCCIC
Kompozisaun Tribunál : Koletivu
Juís : Dr. Ersilia de Jesus, Dra Ana Paula Fonseca, Dr. Ivan A. Gonçalves
Prokuradór : Dr. Benvida do Rosario
Defeza : Dr. Jose da Silva
Desizaun : Pena prizaun tinan 3 suspende ba tinan 4

Iha 11 Maiu 2023, Tribunál Judisiál Primeira Instáncia Dili, prezide leitura akordaun ba krime koasaun seksuál no agravasaun ne'ebé envolve arguidu IdS nu'udar professór hasoru lezada, iha Munisípiu Dili.

Akuzasaun Prokuradór

Prokuradór akuza katak iha 12 Jullu 2022, iha oras tuku 10:30 dadeer, arguidu akompaña lezada hodi esplika kona-ba oinsa atu utiliza komputadór. Iha momentu ne'eba lezada ho arguidu mesak iha sala laran arguidu tuur iha lezada nia sorin parte karuk hodi lamas lezada nia ain-kabun no lamas lezada nia kelen leten halo lezada hakfodak hodi tebe meja ain no arguidu koalía ba lezada nune'e "*ó la hanoín hau no la hadomi hau ka*". Lezada senti taúk no trauma hodi foti pasta taka netik lezada nia saia. Maibé arguidu kontinua lori liman lamas lezada nia saia oin no lori liman fuan rua hanesan ba iha lezada nia orgaun sensitivu ho maka'as no arguidu kontinua dehan ba lezada katak "*ó nonook deit la bele fó hatene ema seluk ita rua mak hatene,*" no kontinua buti lezada nia asentu. Arguidu nia aktu ne'e rezulta lezada trauma sente taúk no moe, tanba arguidu nu'udar ema edukador uja fatin eskola nian hodi halo atitude ne'ebé la di'ak no aproveita situasaun bainhira lezada mesak.

Prokuradór akuza arguidu kontra artigu 171 no 173 alinea (b) KP kona-ba koasaun seksuál no agravasaun ho moldura penál tinan 2 too tinan 8.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak foin primeriavés mai hatan iha tribunál no laiha intensaun atu halo hanesan ne'e. Arguidu mós deklarata katak sira halo akordu dame malu ona no família rua di'ak malu no haree malu hanesan baibain. Arguidu intrega osan US\$500, fahi ida, tais feto ida no bear bintang kaixa rua.

Alende ne'e, lezada kontinua konfirma faktu hotu iha akuzasaun no deklarata katak antes ne'e arguidu sempre gosta kaer lezada nia asentu, banhira lao iha resintu eskola. Lezada mós kofirma katak sira di'ak malu ona ho arguidu. Lezada deklarata liután katak

arguidu entrega duni sasan no osan sira ne'ebé mensiona iha leten.

Testemuña JdJR nu'udar lezada nia kolega depoimenta katak nia haree deit iha momentu arguidu kaer lezada nia asentu, antes lezada ho arguidu ba iha sala hodi prátika komputadór nian.

Testemuña mós deklara katak nia la haree akontesimentu ne'ebé arguidu halo hasoru lezada iha sala laran.

Alegasaun finál

Prokuradór haktuir katak arguidu konfesa parsialmente ba faktu sira iha akuzasaun no konfirma mós husi lezada, mezmú sira diak malu ona no arguidu fó sala ona ba lezada maibé haree ba atitude arguidu nian nu'udar edukador iha eskola tuir loloos la bele halo hahalok hanesan ne'e hasoru aluna sira, nune'e prokuradór husu ba tribunál atu kondena arguidu ho pena prizaun tinan haat.

Entretantu defeza husu ba tribunál atu fó pena ne'ebé justu no adekuadu ba arguidu tanba arguidu rekoñese nia hahalok, arguidu mós laiha intensaun atu hanoin aat ba lezada, arguidu komete hahalok ne'e hanesan spontania, tetu mós ho sirkunstánsia atenuante sira hanesan arguidu fó ona sala ba lezada no família rua halo ona akordu dame no agora família rua di'ak malu ona.

Desizaun

Depoisde avalia faktu sira hotu, tribunál prova katak arguidu komete duni krime hasoru lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

6. Krime ofensa ba integridade fízika simples

Nú. Prosesu	: 0035/22.ALSIC
Kompozisaun Tribunál	: Singulár
Juís	: Dr. Ivan Antonino Gonçalves
Prokuradór	: Dr. Osorio de Deus
Defeza	: Dr. José M. Guterres
Desizaun	: Omologa pedidu dezisténsia keixa

Iha 26 Maiu 2023, Tribunál Judisiál Primeira Instánsia Dili liu husi julgamentu movel iha munisípiu Aileu prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Flaviano Sarmiento Mendonça hasoru lezada Rogela de Deus Simoes, iha Munisípiu Aileu.

Akuzasaun prokuradór

Prokuradór akuza katak iha 12 Novembru 2022, iha oras tuku 2:00 lokraik, arguidu halo seremonia fase nia oan nia matan, nune'e konvida hotu lezada nu'udar viziñu, momentu ne'e iha ema barak mak iha arguidu nia uma, lezada ho nia oan ki'ik nain rua tama ba iha arguidu nia uma laran haree no kaer hamaus arguidu nia oan bebe nia liman no konverse ho arguidu nia feen, la kleur arguidu nia feen bolu arguidu atu haree lai sira

nia oan bebe ne'e, tanba arguidu nia feen atu sai ba liur, nune'e arguidu mós tama ba uma laran hodi haree sira nia oan iha tempu hanesan arguidu haree lezada kaer hamaus hela bebe nia liman, tanba ne'e arguidu hirus baku ses tiha lezada nia liman no dehan ba lezada nune'e "*husik tia la bele book*". Maibé lezada hanoin katak arguidu halimar deit tanba ne'e lezada kontinua kaer no hamaus bebe nia liman no hateten ba arguidu nune'e "*hau hamaus deit saa*", maibé arguidu ho hirus tuku maka'as iha lezada nia inus ruin kauza raan sai maka'as husi lezada nia inus. Mezmu nune'e arguidu kontinua tuku dala ida ho maka'as iha lezada nia ulun parte karuk halo lezada nia oin nakukun lezada monu tun kedas ba rai, bainhira lezada hader lezada ba kedas xefe aldeia no haruka lezada ba kedas hato'o keixa iha polísia nune'e polísia sira transporta hikis lezada ba iha Óspital Referál Maubisse. Arguidu nia aktu ne'e rezulta lezada nia inus raan sai maka'as no sei moras to'o agora.

Prokuradór akuza arguidu kontra artigu 145 kona-ba ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 (1) KPP kona-ba tentativa ba konsiliaun, nune'e antes tama ba julgamentu produsaun ba prova sira, juís husu atu halo tentativa konsiliaun ba arguidu no lezada.

Iha prosesu konsiliaun ne'e, lezada konkorda dame malu ho arguidu tanba antes ne'e sira dame malu ona tuir kultura timor nian no iha akordu dame malu nian, arguidu fó sala ba lezada karau ida no osan US\$250.

Alegasaun finál

Prokuradór ho defeza apresia akordu dame ne'ebé parte rua konkorda ona no husu ba tribunál atu omologa prosesu ne'e.

Desizaun

Bazeia ba akordu dame no pedidu dezisténsia keixa ne'e, nune'e tuir artigu 262 (2) KPP, tribunál konklui prosesu ne'e no omologa kedas akordu dezisténsia keixa ne'e.

7. Krime ofensa ba integridade fízika simples ho natureza violénsia doméstika.

Nú. Prosesu	: 0001/23.LILIQ.
Kompozisaun Tribunál	: Singulár
Juís	: Dr. Argentino Nunes.
Prokuradór	: Dr. Napoleao Soares Da Silva
Defeza	: Dr. Henrique Marriz
Desizaun	: Pena multa US\$60.00

Iha 26 Maiu 2023, Tribunál Judisiál Primeira Instáncia Dili liuhusi julgamentu movel iha Munisípiu Likisá prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CS hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 10 Janeiro 2023, iha oras tuku 09:30 dadeer, arguidu ho kondisaun lanu todan tolok no trata lezada, nune'e, lezada mós hatán ba arguidu katak "atu han ha'u ka?," ho nune'e arguidu dudu lezada ba parede, hafoin arguidu tuku dala ida iha lezada nia knosen parte karuk, rezulta lezada dada iis araska. Antes agresaun ne'e, arguidu ho lezada diskute malu kona-ba arguidu haruka lezada atu ba sosa sigaru maibé lezada hatan katak labarik sira mai mak ba sosa, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak iha akontesimentu ne'e arguidu lanu todan, arguidu mós deklarata katak ho lezada forma uma kain iha tinan 2002, iha oan nain haat, arguidu arrepende ona nia hahalok, antes ne'e arguidu nunka halo problema ho lezada ka ema seluk foin preimeiravés mai hatán iha tribunál.

Alende ne'e lezada kontinua konfirma faktu hotu iha akuzasaun no deklarata katak depoisde problema ne'e moris hamutuk nafatin ho arguidu, di'ak malu ona, arguidu mós husu ona deskulpa ba lezada no lezada mós perdua ona arguidu.

Alegasaun finál prokuradór

Prokuradór konsidera arguidu provadu komete krime hasoru lezada, bazeia ba konfisaun arguidu nian no kofirirma mós husi lezada, nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena admoestasaun ho konsiderasaun katak arguidu konfesa, di'ak malu ona ho lezada, arrepende ona nia hahalok no foin primeiravés mai hatan iha tribunál.

Desizaun

Depois avalia faktu sira hotu, tribunal prova katak arguidu dudu lezada ba parede, hafoin arguidu tuku dala ida iha lezada nia knosen parte karuk, rezulta lezada dada iis araska.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende ona nia hahalok no foin primeiravés mai hatán iha tribunál, ho nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei US\$1.00 durante loraun 60. Tribunál mós fiksa pena alternativa durante loraun 40 prizaun, bainhira arguidu la kumpri pena multa refere.

8. Krime ofensa ba integridade física simples ho natureza violénsia doméstika

Nú. Prosesu : 0083/22.LIBTZ
Kompozisaun Tribunál : Singulár
Juís : Dr. Argentino Nunes
Prokuradór : Dr. Napoleao Soares Da Silva
Defeza : Dr. Henrique Marriz
Desizaun : Pena admoestasaun

Iha 26 Maiu 2023, Tribunál Judisiál Primeira Instánsia Dili liuhusi julgamentu movel iha Munisípiu Likisá prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu VDS hasoru nia feen, iha Munisípiu Likisá.

Akuzasaun prokuradór

Prokuradór akuza katak iha iha 16 Agostu 2022, iha oras 15:00 lokraik, arguidu tuku dala ida iha lezada nia reen-toos, arguidu kontinua foti fatuk kiik ida kaer iha liman hodi tuku tan dala ida iha lezada nia reen-toos no kaer lezada nia fuuk rasta halo lezada monu ba rai. Konsekuensia direita husi agresaun física ne'e, lezada hetan moras maka'as iha reen-toos, bubu no mean. Antes agresaun ne'e, arguidu ho lezada diskute malu kona-ba arguidu ne'ebé ho kondisaun lanu atu han, lezada foin mak atu halo modo, ho nune'e mosu agresaun ne'e no lezada konsege ba halo tratamentu iha Sentru Saúde Likisá.

Prokurador akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa, konjuga ho artigu 2, 3 (a), 35 (b) no 36 LKDV.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak iha akontesimentu ne'e arguidu ho kondisaun lanu todan, arrepende nia hahalok no kazu ne'e konsege rezolve ona tuir lisan Timor nian aguidu fó osan ho montante US\$500.00, bibi aman ida no serveja caixa rua no arguidu mós husu ona diskulpa ba lezada.

Alende ne'e, lezada kontinua konfirma faktu hotu iha akuzasaun no deklarata katak depoisde akontesimentu ne'e sira di'ak malu ona, arguidu mós husu ona deskulpa ba lezada no lezada perdua ona arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no kofirma mós husi lezada, nune'e prokuradór husu ba tribunál atu kondena arguidu ho pena multa.

Enkuantu defeza husu ba tribunal atu kondena arguidu ho pena admoestasaun ho konsiderasaun katak arguidu konfesa, arrepende ona nia hahalok no diak malu ona ho lezada.

Desizaun

Depoisde avalia faktu sira ho tribunál prova katak arguidu tuku dala ida iha lezada nia reen-toos, arguidu kontinua foti fatuk kiik ida kaer iha liman hodi tuku tan dala ida iha lezada nia reen-toos no kaer lezada nia fuuk rasta halo lezada monu ba rai.

Bazeia ba faktu provadu sira ne'e hotu no tetu mós ho sirkunstánsia atenuante sira hanesan arguidu konfesa, arrepende nia hahalok no diak malu ona ho lezada, ho nune'e tribunál konklui prosesu ne'e no kondena arguidu ho pena admoestasaun.

9. Krime abuzu seksuál ba menór

Nú. Prosesu : 0009/16. DIMTN.
Kompozisaun Tribunál : Koletivu
Juís : Dra. Maria Solana, Dra. Albertina Neves no Dr. Afonso Carmona
Prokuradór : Dr. Ricardo Leite Gudinho
Defeza : Dr. Estaque Guterres
Desizaun : Pena prizaun tinan 7

Iha 27 Maiu 2023, Tribunál Judisiál Primeira Instánsia Dili, prezide leitura akordaun ba krime abuzu seksuál ba menór ne'ebé komete husi arguidu VJFB hasoru lezada ho idade (tinan 10), iha Munisípiu Dili.

Akuzasaun prokuradór

Prokuradór akuza katak iha 05 Novembru 2016, iha oras tuku 23:30 kalan, iha lezada nia uma, arguidu tama tan lezada iha lezada nia inan-aman nia kuartu laran hodi kolu lezada nia kalsa too kelen hun, lezada hakfodak no dehan ba arguidu nune'e "*tanba sa ó tama fali mai apa ho ama nia kuartu laran*" maibé arguidu hatan ba lezada katak "*ó toba nonook*" dehan tiha nune'e arguidu fila-fali ba toba iha sala vizita. Liutiha oras balun bainhira lezada toba dukur arguidu tama fali ba hatama liman ba lezada nia roupa laran hodi book lezada nia orgaun sensitivu rezulta lezada sofre moras lezada hakfodak haree hetan arguidu lezada tanis, arguidu baku dala ida iha lezada nia reen-toos hafoin sai ba toba fali iha sala vizita. Iha dadeer lezada hato'o akontesimentu ne'e ba lezada nia inan no lezada nia inan ba hato'o kedas keixa iha polísia, akontesimentu ne'e rezulta lezada sente tauk.

Prokuradór akuza arguidu kontra artigu 177 alinea (1) KP kona-ba abuzu seksuál ba menór ho moldura penál tinan 5 too tinan 20 no artigu 182 KP kona-ba agravasaun.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arrepende nia hahalok, foin primeiravés mai hatan iha tribunál no arguidu mós deklara katak arguidu hela ho arguidu nia maun sira atu eskola no hela besik malu ho lezada, tanba ne'e arguidu ba toba iha lezada nia uma.

Iha prosesu ne'e tribunál labele rona deklarasaun lezada nian, tanba tribunál labele identifika lezada ninia hela fatin, nune'e tribunál presindi lezada ninia deklarasaun tanba arguidu konfesa faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, nune'e husu ba tribunál atu kondena arguidu ho pena prizaun tinan lima.

Entretantu defeza husu ba tribunál atu kondena arguidu ho pena prizaun maibé suspende ninia ezekusaun ho konsiderasaun katak, arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avali faktu sira hotu tribunál prova katak iha 05 Novembru 2016, iha oras tuku 23:30 kalan, iha lezada nia uma, arguidu tama tan lezada iha lezada nia inan-aman nia kuartu laran hodi kolu lezada nia kalsa too kelen hun, lezada hakfodak no dehan ba arguidu nune'e *"tanba sa ó tama fali mai apa ho ama nia kuartu laran"* maibé arguidu hatan ba lezada katak *"ó toba nonook"* dehan tiha nune'e arguidu fila-fali ba toba iha sala vizita. Liutiha oras balun bainhira lezada toba dukur arguidu tama fali ba hatama liman ba lezada nia rounpa laran hodi book lezada nia orgaun sensitivu rezulta lezada sofre moras lezada hakfodak haree hetan arguidu lezada tanis, arguidu baku dala ida iha lezada nia reen-toos hafoin sai ba toba fali iha sala vizita.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan hitu.

10. Krime tentativa no tentativa nia punibilidade abuzu seksuál ba menór

Nú. Prosesu : 0129/21. LIBZT.
Kompozisaun Tribunál : Koletivu
Juís : Dra. Maria Solana, Dra. Albertina Neves no Dr. Afonso Carmona
Prokuradór : Dr. Ricardo Leite Gudinho
Defeza : Dr. Fernando Lopez
Desizaun : Pena prizaun tinan 2 suspende ba tinan 3

Iha 27 Maiu 2023, Tribunál Judisiál Primeira Instansia Dili, prezide leitura akordaun ba krime tentativa no tentativa nia pinibilidade abuzu seksuál ba menór ne'ebé envolve arguidu MBdS hasoru nia bei-oan, iha Munisípiu Likisá.

Akuzasaun prokuradór

Prokuradór akuza katak iha 10 Novembru 2021, iha oras tuku 09:45 dadeer, bainhira lezada lao halimar ba iha arguidu nia uma, testemuña ho nia oan mane tinan 3 mós tuir lezada ba atu kuu ai-farina tahan iha toos ne'ebé lokaliza besik arguidu nia uma, bainhira to'o iha arguidu nia uma testemuña haree odamatan xave metin, nune'e testemuña bolu lezada no arguidu maibé la hatan no odamantan xave metin hela. Ho nune'e testemuña hafuhu liuhusi odamatan let no haree uluk lezada isin molik no

hateke hela ba arguidu no arguidu mós la uza roupa tuur iha kama leten no hateke hela ba lezada. Ho nune'e testemuña hanoin katak arguidu estraga ona lezada, tanba ne'e testemuña tebe arguidu nia odamatan ho maka'as halo arguidu nia odamatan nakloke no konsege haree arguidu ho lezada isin molik hela. Testemuña dada uluk lezada lori sai husi arguidu nia uma hodi ba fó hatene lezada nia aman ne'ebé koa hela tua besik motaibun, maibé bainhira mai fali haree arguidu halai lakon tiha ona husi nia uma. Iha 28 Novembru 2021, mak arguidu nia maun ba lori fila-fali arguidu mai fali iha nia uma. Testemuña mak lori lezada ba apresenta keixa iha polísia Eskuadra Likisá, maibé la lori lezada ba halo tratamentu iha ospítal.

Prokuradór akuza arguidu kontra artigu 23, 24 no 177 KP kona-ba tentativa, tentativa ninia punibilidade abuzu seksuál ba menór ho moldura penál tinan 5 too tinan 20 prizaun.

Produsaun ba prova sira

Iha prosesu julgamentu, arguidu nega faktu hotu ne'ebé akuza ba arguidu, arguidu deklaraliután katak laiha kuñesimentu kona-ba akontesimentu ne'e, tanba iha akontesimentu ne'e arguidu moras no halo hela tratamentu iha Dili no hela iha arguidu ninia subriñu.

Iha parte seluk, lezada deklaraliután katak arguidu hasai deit lezada nia faru, la kaer no buti lezada nia isin no arguidu ho kondisaun la hatais roupa.

Testemuña ne'ebé nu'udar lezada nia inan depoimenta katak iha akontesimentu ne'e testemuña atu ba kuu ai-farina tahan no bainhira to'o iha arguidu nia uma bolulezada maibé lezada la hatan no odamatan taka metin hela, nune'e testemuña hafuhu husi odamatan let haree lezada la uza faru no arguidu no arguidu tuur iha kama leten la uza roupa. Testemuña hanoin arguidu estraga ona lezada, nune'e testemuña tebe odamatan halo naksobu hodi no haree arguidu la uza roupa no lezada mós la uza faru, ho nune'e testemuña dada sai lezada husi uma laran hodi ba apresenta kedas ba iha lezada nia apa no bainhira sira sira fila-fali ba arguidu nia uma arguidu halai lakon tiha maizumenus fulan ida hanesan ne'e mak arguidu fila fali mai nia uma.

Alegasaun finál

Ministériu Públiku husu tribunál atu kondena arguidu tanba arguidu la kolabora no nega faktu sira ne'ebé nia rasik ho momoos no loloos, nune'e husu ba tribunál atu kondena arguidu ho pena prizaun ba tinan 6.

Entretantu defeza husu ba tribunál atu absolve arguidu husi krime ne'e, tanba antes ne'e arguidu ho lezada nia inan aman sira iha ona problema kona-ba rai no bazeia mós ba, lezada no testemuña nia deklarasaun katak arguidu ho lezada iha duni kuartu laran arguidu hasai de'it lezada nia faru no la komete aktu ruma hasoru lezada.

Desizaun

Depoisde avalia faktu hotu tribunál konsidera faktu ne'ebé akuza husi prokuradór ne'e provadu hotu, maibé iha produsaun ba prova la konsege prova arguidu prátika krime

tentativa abuzu seksuál ba menór hasoru lezada, ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu.

11. Krime pekulatu ho uzu

Nú. Prosesu : 0001/22.CAC TL
Kompozisaun Tribunál : Singulár
Juís : Dr. Alvaro Freitas
Prokuradór : Dr. Antonio Tavares
Defeza : Dr. José M. Caetano
Desizaun : Pena prizaun tinan 1 suspende ba fulan 6

Iha 30 Maiu 2023, Tribunál Judisiál Primeira Instánsia Dili prezide leitura sentensa ba krime pekulatu ne'ebé envolve arguidu Bendito Marçal Conçeição hasoru Estadu RDTL, iha Munisípiu Dili.

Akuzasaun Prokuradór

Prokuradór akuza katak iha 15 Marsu 2022, maizumenus iha oras tuku 13:00 lokraik, arguidu kondus motorizada ho marka Supra X para hela iha fatin kampaña kandidatura prezidenti husi Partidu CNRT nian iha kampo Tasi-Tolu. Bainhira ekipa CAC husi parte prevensaun nian halo observasaun iha terenu hetan motor ho marka Supra X ho xapa matrikula G.1417 ne'e para duni iha entre motor sira ne'ebé ema uza hodi halo kampaña no husi ne'eba kedas parte CAC halo kedas apreensaun hodi hein ema ne'ebé lori motor refere, maibé iha tempu ne'eba la konsege hetan ema ne'ebé lori motor estadu ba tuir kampaña. Ho nune'e CAC ho Polísia PNTL ne'ebé halo hela siguransa iha fatin kampaña hasai foto no tula kedas motor ne'e hodi halo apreensaun no lori kedas motor ne'e ba iha edificíu CAC hodi halo prosesu identifikaun ne'e ikus mai identifika katak arguidu mak lori motor ne'e iha momentu ne'eba no iha investigasaun arguidu mós rekoñese katak motor ne'e arguidu mak uza durante ne'e.

Prokuradór akuza arguidu kontra artigu 296 KP kona-ba Pekulatu ho uzu ho moldura penál prizaun too tinan 2 no artigu 244 KP kona-ba dezobediénsia ho moldura penál too tinan 3 ka multa.

Produsaun ba prova sira

Iha julgamentu, arguidu nega faktu hotu iha akuzasaun no haktuir katak iha momentu ne'eba arguidu han hela iha warung iha Bundaran Lafatik Komoro, derepentí arguidu sai mai haree motor ne'ebé arguidu uza laiha tiha ona, arguidu husu ba ema sira ne'ebé iha fatin refere no ema sira ne'e informa katak polísia mak foti tiha ona arguidu nia motor, nune'e halo arguidu duvida. Arguidu hatutan liutá katak faktu sira ne'ebé CAC apresenta ne'e falsu no bosok tanba ema bele edit, tanba momentu ne'eba arguidu la ba tuir kampaña polítika iha Tasi-Tolu no han hela iha warung.

Testemuña Osme Correia nu'udar Tekniku Administrasaun Logistika MCIA no Guido dos Santos hanesn xefi Logistika konfirma katak motor supra X ho xapa matrikula G.1417 ne'e MCIA nian no durante ne'e atribui ba arguidu hodi uza ba atividade serbisu nian, tanba arguidu nu'udar funsionáriu iha MCIA. Testemuña sira hatutan liután katak

iha tempu ne'eba iha oras tuku 13:00 ba leten motor ne'e la para iha edificiu MCIA nian, hafoin liutia semana ida mak hetan notifikasaun husi CAC katak motor refere hetan aprensaun husi CAC iha fatin kampaña Tasi-Tolu, bainhira kampaña kandidatura prezidenti nian.

Alegasaun finál

Prokuradór konsidera katak hahalok arguidu nian ne'e provadu no prenze duni elementu krime Pekulatu ho uzu. Tanba ne'e, atu bele halo prevensaun jerál iha futuru husu ba tribunál atu kondena arguidu ho pena prizaun tinan ida pena suspende ba fulan neen, enkuantu kona-ba krime dezobediénsi ministériu públiku husu atu altera tiha tanba la priense rekezitu husi krime refere.

Entretantu defeza konsidera faktu hotu la provadu tanba bazeia ba deklarasaun arguidu nian katak la lori motor ba tuir kampaña politika iha momentu ne'eba no deskonfia katak ne'e aktu hosi ema seluk ne'ebé la gosta arguidu mak halo hahalok ida ne'e. Defeza mós kestiona kona-ba foto sirane'ebé prezenta husi CAC, nune'e husu ba tribunál atu absolve arguidu husi krime ne'e.

Desizaun

Depoisde avalia faktu hotu ne'ebé produs durante julgamentu tribunál konsidera arguidu provadu komete duni krime ne'ebé akuza ba arguidu.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e. Tribunál konklui prosesu ne'e konsidera arguidu nia aktu ne'e priense duni element husi krime pekulatu ho uzu, nune'e tribunal konklui prosesu ne'e no kondena arguidu ho pena prizaun tinan ida suspende ba fulan neen. Entretantu ba krime dezobediénsia tribunál la prova tanba la prinse rekezitu husi regra ruma ne'ebé governu aprova hodi sai legalidade formál no materiál ne'ebé dirigi expresamente hanesan devér ba funsionáriu hotu tenke obedese.

12. Krime fraude fiskál

Nú. Prosesu	: 0103/16.PGGCC
Kompozisaun Tribunál	: Koletivu
Juís	: Dr. José Gonçalves, Dr. Alvaro Maria Freitas no Dr. Argentino Nunes
Prokuradóra	: Dra. Lidia Soares
Defeza	: Dr. José Guterres no Dr. Arlindo Sanches (Advogadu Privadu)
Desizaun	: Absolve

Iha 31 Maiu 2023, Tribunál Judisiál Primeira Instánsia Dili, Prezide leitura akordaun ba krime fraude fiskál ne'ebé envolve arguidu Bartolomeu Sequeira, João Batista Fernandes Alves no José Maria dos Reis, iha Munisípiu Dili.

Akuzasaun prokuradór

Prokuradór akuza katak iha 05 Novembru 2002 to'o iha fulan Juñu 2016, Empreza Sunshine Pedtrol Group hahú registu ho TIN 1018089, ho sede Rua Audian, Vera Cruz, Dili ho sosiu sira husi arguidu João B.F Alves kuota 40%, arguidu Bartolomeu Sequeira ho sosiu 30% no arguidu José Reis ho kuota 30% aktividade ekonomia komersiu kombustivel ba veikulu sira.

Iha tinan 2009 no 2010, empreza Sunshine Pedtrol Group asina kontratu ho governu hodi fornese mina ba EDTL.

Iha 10 Novembru 2010, Estadu RDTL halo ona pagamentu ba konta bankaria Empreza Sunshine Petrol Group ho nú. konta bankaria 193544210001 ba kontratu ne'ebé mak asina ho montante US\$ 5, 235, 637.52 (tokon lima rihun atus rua tolu nulu resin lima dollar atus neen tolu nulu resin hitu no sentavus lima nolu resin rua).

Maibé hahú iha 25 Maiu 2010 to'o 29 Dezembru 2010, empreza refere hetan autorizasaun hosi Diresaun Nasional Alfandega hodi loke armagen mina nian ho estok mina litru 17,435.105 no Empreza Sunshene Petrol Group seidak selu taxa aduaneiru iha Diresaun Alfandega ba estok mina ho total taxa US\$ 1,215,907.09 (tokon ida rihun atus rua sanolu resin lima no dollar atus sia hitu sentavus sia). Empreza Sanshine Petrol Group ho TIN 1018089 iha obrigasaun hodi selu 0,50% kada fulan husi rendimentu detekta katak empreza refere hahú registu iha sistema inpostu doméstika (SIGTAS) iha 1 Juñu tinan 2003, no apenas deklara ba tributaria hanesan tuir mai, iha fulan Agsstu 2004 to'o 2011 empreza refere hahú selu taxa sobre salariu (wage income tax) ba estadu ho montante US\$ 4,965.50. Iha fulan Agostu 2004 too Marsu 2007 empreza refere nunka deklara inpostu rendimentu (income tax). Iha fulan Abril 2007 too 2011, hahú selu inpostu rendimentu (income tax) US\$ 304,017.85.

Iha 2011 to'o 27 Juñu 2016, empreza refere la selu no la deklara rendimentu ba iha diresaun inpostu domestika. Arguidu sira ho intesaun hakarak hases aan husi pagamentu taxa no mós inpostu hodi bosok autoridade Alfandega katak ministériu finansas seidak halo pagamentu maibé de faktu empreza refere hetan tiha ona pagamentu. Konsekuensia husi arguidu sira nia hahalok ne'e Estadu RDTL hetan prejuizu ho montante US\$1,215,907.09.

Prokuradór akuza arguidu sira kontra artigu 314 nú. 2 KP kona-ba fraude fiskál ho moldura penál tinan 2 too tinan 8.

Produsaun ba prova sira

Iha prosesu julgamentu arguidu sira deklara katak faktu balun loos no balun laloos no deklara kompania ne'e hari'i iha tinan 2000, tempu UNTAET nian, tanba momentu ne'eba UN loke konkursu publiku ba mina nian no iha momentu ne'e arguidu José Maria dos reis ba fali membru konstituante, nune'e arguidu nain rua seluk ida idak ba halo nia serbisu seluk, arguidu sira deklara liután katak iha tinan 2002, arguidu sira la nain ona ba kompania refere no deklara liután katak kompania refere iha duni número TIN maibé kleur ona nune'e haluha tiha ona no la lori dokumentus kompania nian ne'e ba registu iha notariadu no autóridade auduaneiru tanba kompania refere la iha surat

lisensa nian no nunka entrega kompania ne'e ba ema seluk no nunka asina dokumentu ruma.

Testemuña sira husi autoridade aduaneiru mós depoimentu katak kompania nia nain laos arguidu sira no nia nain husi ema rai liur. Iha parte konsultan husi *Sunshine Petrol Group* iha Timor-Leste mós deklara katak sira iha momentu ne'eba sai hanesan konsultan nasional ba kompania refere, maibe só hatene katak kompania Consortiums Internasionál ho atividade joint ba forneseментu mina mai Timor-Leste hamutuk ho kompania lokal sira hanesan ETO iha Timor Leste, maibe sira la kofese owner ka nai'n ba kompania refere mak se loos iha momentu ne'eba.

Alegasaun finál

Prokuradór haktuir katak haree ba faktu sira ne'ebé iha husu ba tribunál atu kondena arguidu nain tolu ho pena prizaun tinan 5 no selu indemnizasaun sivil ne'ebé konsta iha akuzasaan ho montante milliaun US\$1,215,907.09.

Entretantu defeza husu ba tribunál atu absolve arguidu sira husi kremi ne'e, tanba ministériu públiku nu'udar nai'n ba asaun penal la konsege prova faktu sira husi akuzasaan ne'ebé imputa ba sira kona-ba se loos mak nai'n ba kompania Sunshine Petrol Group.

Desizaun

Depoisde avalia faktu hotu tribunál provadu katak 1 Juñu 2003, Sunrise Petrol Group rejistu duni iha sistema autoridade audoneira no autoridade tributaria, Empreza Sunrise Petrol Group halo duni atividade hatama konvustivel mai Timor Leste no faan sasan hirak ne'e ba iha publiku, Sunrise Petrol Group faan mós ba EDTL no supply ho akordu ne'ebé selebradu entre Governu RDTL ho Sunrise Petrol Group iha 2010 to'o 2013. Sekuensia husi faktu sira ne'e tribunál identifika katak kompania Sunrise Petrol Group hatama mina iha tinan 2010 ho valor osan hamutuk miliaun US\$6,322.000, prova mós katak kompania Sunrise Petrol Group hetan pagamentu husi Governu Timor-Leste miliaun US\$5 ba konta bankaria kompania Sunrise Petrol Group liuhusi baku BNU Sukursal Dili ba atividade forneseментu mina konbustivel iha Oliu pezadu Hera, prova mós katak Kompania Sunrise Petrol Group la selu taxa aduaneira ho total orsamentu miliaun US\$1,215 no prova mós katak kompania Sunrise Petrol Group hatama duni konvustivel 17 mil barel iha 25 Maiu 2010 no la selu taxa.

Faktu provadu ba selu taxa mak hanesan kompania Sunrise Petrol Group sempre regularmente selu taxa impregador sira nian iha tinan 2010 ho valor US \$4 mil ital iha ministériu finansas. Iha 2011 to'o Jullu 2016, Kompania Sunrise Petrol Group la deklara rendimentu atu selu taxa rendimentu iha autoridade aduaneira, prova mós katak nain ba kompania mak Cioncin Min nu'udar jenerál manjer ne'ebé mak agora dadaun nain ba kompania Sunrise Petrol Group hela iha Singapura ne'ebé iha deit nia representasaun ema Timor oan nain 2 iha Timor Leste nu'udar konsultor, prova mós katak arguidu sira imprezariu Timor oan no la iha antesendente kriminal no prova mós katak arguidu sira la halo sosiu ho saham ka sosiu ne'ebé Ministériu Públiku imputa no nai'n ba Kompañia Sunrise Petrol Group ema husi rai liur.

Bazeia ba faktu provadu hirak ne'e, la prova katak arguidu sira mak na'in ba kompania ne'e no nain ba kompania ne'e loloos mak Cioncin Min ne'ebé hela iha Singapura. Tribunál konsidera arguidu sira la provadu komete krime ne'ebé akuza ba sira, nune'e tribunál konklui prosesu ne'e no absolve arguidu sira husi krime ne'e.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl